

Школ болн эк-эцкнр

Элст балгьсна негдгч номерта долан джилин сургъулин школ 1957-58 сургъулин джилд, ниднин джилин эдү мет цагла дүнъгцүлхлә, сургъулин болн сургъмджин кōдлмштән темдгтә сән күцлтәгъяр ирв. Ганцхн эклцин классмудин кōдлмшәр авад хәләхлә, эн деер келгдсн үгмүдт хәрү өгч болхмн: 1-с авн IV-ч класс күртл сурцах 233 сургъульчас 9 сургъульч муугъар сурч йовна. 224 сургъульч мел „4“ болн „5“ гисн темдгтәгъяр сурчана.

Болв, 5-7 классмудар сургъулян муугъар дасджах, урокан дасдго, багширин өмнәс шүрүлкәд, альвлад, тәмк татад, школин диг-дара эвдәд бәәдг сургъульчнр багъ биш. 7-ч классин сургъульч Кириллович, 5-ч „Б“ классин сургъульч Бадаевич, 4-ч классин сургъульч Буцкий—эднә тоод үзүлдж болхмн. Эн сургъульчнрин эк-эцкринь, эврәннь күүкдиннь иим эвго йовдлмудинь, сургъулян муугъар сурдгинь, кесг болх-болшго учрмудар тәәлдж, зөв өгцхәнә.

Шидрхн болсн эк-эцкрин хуртгт эн школин директор үр Болдырев Ц. У. цуг эн төрмүдәр цәәлгъдж келәд, багш-

нрин коллектив эк-эцкнрлә тасрхан уга залгълдата бәәдж, цааранднь кōдлмшән улм ясрулхин тускар келв.

Хальмг кел сургъульчнрт дасхлгъиг эрк биш ясрултха гидж хуртгт ирсн эк-эцкнр школд неквр тәвб. Тернь мел чик. Ода күртл эн төр эврәннь тоомсрта орман эзләд уга.

Балгьснд электростанц тасрхан уга герл өгдго учрар өдр болгън 2-ч смена 5-6-ч урокс болго, сургъульчнриг хәрүлчкәд бәәдг йовдлд ик оньган өгч келгдв. Балгьсна күцәгч комитет эн төрт икәр оньган өгч, школд дөнъгән күргтхә гидж эк-эцкнрин хуртг сурвр кев.

Күүкдт сургъмдж дасгъхл эк-эцкнрин нилч ямаран болхин тускар, школин завуч Бабенко А. Г. доклад кев. Кесг сургъульчнрин эк-эцкнрәс, му халхаснь чигн, сән халхаснь чигн үлгүр авч келәд, күүкдән сургъмджта болгъхин төлә, сургъульдан шунмгъа болгъхин төлә, цуг эк-эцкнр ямр кевәр күүкдиннь өөр бийән бәрхинь, эврәннь залмдж болн нилчән күүкдтән ямаран бәәдлтәгъяр хальдахинь цәәлгъдж келдж өгв.

В. АНДРЕЕВ.